

Li Tchant des Walons

(version originale en wallon liégeois)

I.

Nos-èstans fîrs di nosse pitite patrèye,
Ca lådje èt long, on djåse di sès-èfants.
Å prumi rang on l' mèt' po l' industrèye
Et d'vins lès-ârts èle riglatih ot'tant.
Nosse tère èst p'tite, mins nos-avans l' ritchèsse
Dès-omes sincieûs qu'anôblihèt leû nom.
Et nos-avans dès libèrtés timpèsse :
Vola poqwè qu'on-z-èst fîr d' èsse Walon !
Et nos-avans dès libèrtés timpèsse :
Vola poqwè! Vola poqwè qu'on-z-èst fîr d'èsse
Walon !

II.

Di nosse passé, qwand c'èst qu'on lét l'istwère,
On s'rècrèstèye vormint à chaque foyou,
Et nosse coûr crèh' qwand c'èst qu'on tûse al
glwère
Di nos vis péres qui n'avit mây pawou.
C'est grâce a zèls qui n'djouwihans dèl pây,
Il ont sprâtchî l'inn'mi d'zos leû talon;
On l'z-a r'clamé lès pus vaillants qu'i-n-âye
Vola poqwè qu'on-z-èst fîr d'èsse Walon !
On l'z-a r'clamé lès pus vaillants qu'i-n-âye
Vola poqwè! Vola poqwè qu'on-z-èst fîr d'èsse
Walon !

III.

On s'veût vol'tî inte frés dèl Walon'rèye
Et l'on-z-èst prêt'onk l'aûte a s'diner l'main ;
On s'fait plaisir bin sovint sins qu'on l'dèye,
Nouk ni s'hågnêye qwand c'èst qu'i vout fé l'bin
Li tcharîté qui mousse èl mohinète
N'î va qu'al nut' avou mèye précôcions ;
Li pô qu'on done on nêl donne qu'è catchète :
Vola poqwè qu'on-z-èst fîr d'èsse Walon !
Li pô qu'on done on nêl donne qu'è catchète :
Vola poqwè! Vola poqwè qu'on-z-èst fîr d'èsse
Walon !

IV.

Pitit payîs, vos qu'a tant d'grandeûr d'âme,
Nos v's-inmans bin, sins qu'nos l'brèyanse tot
haut ;
Qwand on v'kidjåse, ås-oûy montèt nos lâmes
Et nos sintans nosse coûr bate a gros côps !
N'âyiz nole sogne èt vikése è liyèsse
Di vos èfants lès brès èt l'coûr sont bons,
Et nos avans lès dj'vès fwèrt près dèl tièsse :
Vola poqwè qu'on-z-èst fîr d'èsse Walon !
Et nos avans lès dj'vès fwèrt près dèl tièsse :
Vola poqwè! Vola poqwè qu'on-z-èst fîr d'èsse
Walon !